

## KANTIK AR C'HLOC'H



WAR DON : *Santez Mari, Mamm Doue...*

*Diskan.* Un peu lent.

Kloc'hik, kân sklin-tin Da noz, da vin-tin. Gloar,  
gloar da Zou- e Ha joa d'ann i- ne !

1.

Kanit, kleier binniget, kanit euz lein ho tron,  
Ho mouez bepred dudiuz 'ra tridal ar galon.  
Bugale ha tud iaouank, tad, mamm, pinvik ha paour,  
Selaouit mouez ho kleier ; kaëroc'h eo 'vid ann aour !

2.

Kement tra gret gant Doue en deuz mouez da gana,  
Kana gloar ha karante Krouer braz ar bed-ma :  
Mouez hon c'hleier binniget, eo ken kaër mouez a zo :  
Bemde e lar d'ar c'hristen : « Kar Doue ha da Vro ! »

3.

Ar c'hloc'h a zo prezeger, prezeger gallouduz :  
Gwech e son nerzuz, laouen, gwech e klemm truezuz ;  
Ha peb zon zo sklerijenn evid ar sperejou,  
Joa, strafil pe spont frouezuz evid ar c'halonou.

## 4.

Selaouit : ar c'hloc'h a zon ; petra lar ? — D'ann daoulin  
 Stou, kristen, ann *Anjelus* gant he vouez kel lirzin  
 A brezeg d'id eur mister : Eil Ferson ann Drinded,  
 Ganet gant Mari, Gwerc'hez, 'tousez ann dud 'neuz bevet.

## 5.

D'ar zuliou ha d'ar goueliou, moueziou a zav enn er  
 Euz touriou dantelezet, steredennet ken kaër ;  
 Zevel a reont ive euz tour ar barrozik :  
 Ar c'hristen 'red d'ann Iliz, kerkoulz paour ha pinvik.

## 6.

Ann Iliz eo Ti Doue, hi eo Ti ar bedenn ;  
 Enn Iliz Belek Jezuz, epad ann oferenn,  
 A zigemer oll veuiou kristenien ar barrozk,  
 Mouez ar c'hleier binniget ho c'has d'ar baradoz.

## 7.

Sellit ar meserik paour er prad pe el lannek :  
 P'en deuz klevet glaz ann noz, e lar e brezonnek :  
 « Pardonit, o ma Doue, pardonit d'ann anaon ; »  
 Ha, gae, warlerc'h he vandenn, e teu d'ar ger hep aon.

## 8.

Pegen dous d'al labourer, gleb-dour gand ar c'houezenn,  
 Klevet ar c'hloc'h o laret : « Ehan, gra da bedenn !  
 Ar bedenn zo eul labour binniget enn Envou,  
 Evit pae, Doue a skuill gliz dru war ar parkou ! »

## 9.

Levenez ar vamm gristen piou c'hellfe dizrevel,  
 Pa glev kloc'h ann *Te Deum* o kana d'he bugel ?  
 Dre he gan, ar c'hloc'h a lar : « Kaër-kaër eo he ine ! »  
 Hag ar Vamm enn he c'halon : « Elik koant da Zoue. »

## 10.

Ann Tad-koz a drid, pa glev o kana d'he vleo gwenn  
 Ar c'hloc'h a gane gwechall, pa oa he vleo melenn !  
 Unani be ha kavel, tad-koz ha mab bihan ;  
 Na kaër 'ta eo mouez ar c'hloc'h, euz lein he dron pa gan !

## 11.

Me wel eur zoudard iaouank, ganet e Breiz-Izel,  
 Duet gant poultrenn ann hent, brevet gant ar brezel,  
 Kollet en deuz he oll nerz, dale eo da zempla,  
 Pa glev eur vouez dudiuz, mouez he gloc'h o kana !

## 12.

He voad a zeu da domma ; redek 'ra he zaërou ;  
 He galon a lamm 'n he greiz ; tec'het eo he boaniou....  
 Mouez kloc'h he gatekizou e deuz he gonfortet ;  
 Mouez ar c'hloc'h, zoudard breizad, ra da nerzo bepred !!

## 13.

Dec'h, kloc'h ann Aotrou Doue a dinte truezuz,  
 (Ar belek d'ar c'hlanvour paour a zouge he Jezuz,)  
 Hag hirie klemmuz e son ! eur c'hristen tremenet,  
 Dizoc'h he erv, d'ar bed-ma keno en deuz laret.

## 14.

Kanet eo ar pedennou, ar c'horf 'zo er verred,  
 Daërou dik 'gouez d'ann douar, kalonou 'zo mantret ;  
 Keno, tad, keno, mamm ger ; keno, breur, keno, c'hoar !!  
 « Keno, 'lar ar c'hloc'h ive, keno, keno er gloar !! »

## 15.

Mouez-kanvou ar c'hloc'h eo mouez eunn tad, eur vamm maro,  
 A lar d'ar bugel prodig : « Ann env eo da wir vro ;  
 Dilez 'ta da dechou fall, lak urz vad 'n ez ine ! »  
 Hag ar paour kez reuzeudik a dro war zu Doue.

16.

Pa zigouez reuziou er vro ; dic'hlargn, brezel, tan-gwall,  
Kloc'h ann Iliz 'vo klevet o tintall, o tintall ;  
He vouez klemmuz a laro : « Zikour, zikour, timad ! »  
Kerkent o stourm vo gwelet merc'h ha mamm, mab ha tad.

17.

Gwasoc'h reuziou, ziouaz d'imp, zo zavet war ar bed :  
Oll vugale Lusifer a zo dichadennet ;  
Mouez ar c'hleier binniget a vo da bep kristen  
Ar barr-avel a skubo ann drouk, ar falz-kreden.

18.

Kanit, kleier binniget, kanit, kanit huel !  
Ha c'houi oll, bugale Breiz, selaouit ho c'hentel ;  
Ho c'hentel vo eunn douzder evid ho kalonou,  
Mar he c'heuliet, c'houi ho po kurunen enn envou ! !

F. ROLLAND, PERSON LARUEN.

---

*Ann Otro nn'Eskop a ro daou-ugent devez a induljanz da  
gement hini a gano enn he Eskopti ar c'hantik-man gant  
doujanz Doue.*

**Imprimatur :**

Brioci, die 19<sup>a</sup> junii 1894.

LE PROVOST, *Vic. gen.*,  
*Archid. Trecoren.*